

# ES OF D'R DUUVEL D'R MIT SJPILT

Teksdichter **Edwin Peelen**  
Toeëndichter **Edwin Peelen**  
Oetveurend arties **45èlf**  
Arrangement **Joep Servais**  
Opnametechniek **Marlstone Music**

*Mèh nòndedzju, dat mót dich wer gebuure. Dat kin d'r óch nóg waal bei. Dich hingt de penurie richtig an gen vót!  
Noe móste ins loestere! Noe loester ins:*

[koeplet ee]

Doa vilt alwer ins oane sjuëtel dich de vuurduur in 't sjlót.  
Mit inne sjoape kóp doa sjeertste dich dieng ganse moel kapót.  
Doe hast dieng vrouw vanmörge sjtiékem mit d'r milkboer gezieë  
en diene baas zeët dich, vanoet 't nieks, noa twintig joar adieë.

Deë mótte-doa-zieë-sjoeën-mamoavend doert al wer ins vóalste lang.  
Sjuufs van 't zadel óp d'r fiets mit die vehikel óp de sjtang.  
Kriest mit gekloemel aan ing lamp 'twieëtwintig' durch gen lief gepaaf.  
Kunst oet d'r vlieger noa de zón alling mit sjpringe nog eraaf.  
D'r noaberhónk deë hat dich richtig in de bats gehad  
en die bedórve eëpelsjlaat hilt dich de ganse weëk al plat.

[refring]

't Is genauw es of d'r duuvel d'r mit sjpilt;  
dat deë malheur dich jieëker kier wer uëvervilt.  
Want wenste dinks 't kin bekans nit sjlechter goa,  
sjteet wer deë ónduëg mit get ieëlend vuur dich kloar.  
't Is genauw es of d'r duuvel d'r mit sjpilt.  
Weëd 't geluk, zoeë wieste vings, mar sjlech verdilt.  
Zakt van deë teëgesjlaag dich in de sjoon d'r mood,  
da weet: 't kunt oetintelig allenui waal good.

[koeplet twieë]

Durch d'r kwaffeur, mit zie gehóddel, lópste weëke lank vuur sjut  
Books ee tiën-sjerre-logement, mar kriest ing oetgeleëfde hut.  
Mit get geknauwel óp ing koeësj brikt dich 't valsj gebid in twieë.  
En móste dich ópnui bewiese? Wirkt die óngersjtjel nit mieë.

Zint durch ee loak in de vóljère al dieng k'naries dich ontsjnapt.  
Bis mit dieng pas gewiekste sjoon wer driftig in d'r sjtront getrapt.  
En dat gesjrael in d'r gaad, dat merkste, deed dich richtig good,  
mar bei 't sjuppe in d'r drek sjtikste de sjteëksjup in d'r voot.  
Bist vuur deë kursus 'nieëne' vuur de tieënde kieër gezakt  
en óp de wesj die hingt te druëge hat zoeëgraat ing musj gekakt.

[refring]

[tusjestuk]

En wilt ing beëter tied vuur dich nit kómme  
en geet dich die malaise an de prie.  
Da vloek ins effe kreftig potverdómme...  
Van gódmiljaar! Mie leef Merie! Noe lek mich toch... en nóndepie!

[refring]

da weet: 't kunt oetintelig allenui waal good.  
en geëf deë duuvel tot die tied mar sjun de sjood.